

Suenter diesch onns puspei ina equipa da junioras pils Desertina Bulls

Suenter diesch onns han ils Desertina Bulls puspei saviu separticipar cun in'equipa al campinadi da giuvnas tochen e cun 16 onns. Cun in cader dad endisch giugaduras han ellas giu da semesirar cun differentas equipas dalla Svizra. La gronda part han ellas giu da giugar encunter equipas da Turitg, Turgovia e Sogn Gagl. Ina runda da campinadi han ellas era giu a casa a Mustér. Igl ei stau in dils highlights per las giuvnas sursilvanas d'astgar giugar avon igl agen publicum.

Ei era da quintar che quei vegni ad esser ina fetg greva sesiun, perquei che fetg paucas giuvnas han dau unihoc ils davos onns. Aschia muncava il svilup egl unihoc tier las giuvnas e cunzun era l'experientscha. Las duas trenadras *Selina Giger* e *Noemi Zanin* han denton preparau fetg bein l'equipa silla sesiun da campinadi. Quei ei lu era semussau el campinadi. Senza saver tgei che spetgi, han ellas giugau runda per runda e han saviu far novas experientschas.

Buna raccolta da puncts

Era sche la savida era buca la medema sco quella d'autras equipas han ellas adina saviu tener petg cugl adversari e mintga singula ha saviu far in bien svilup. Cun in fetg bien spért d'equipa ein ellas vegnidas da vilentar e mudergiar pliras equipas. La fin finala han ellas gudignau quater giugs e fatg dus paris ed aschia terminau la sesiun cun diesch puncts sil novavel plaz. Quei para forsa buca dad esser massa puncts, sch'ins risguarda denton che las giuvnas dattan pér dapi in entochen dus onns unihoc e han aunc mai dau campinadi avon, ei quei ina fetg buna raccolta. Cun empau dapli experientscha havess ei tochen il davos aunc tunschiu per in ni l'auter punct dapli cun quei ch'entgins giugs ein vegni spiars mo per pauc.

L'otra stagiun junioras A

La proxima sesiun ein ils Desertina Bulls loschs da puspei saver dar campinadis cun ina equipa da junioras A. Quei ei ina categoria, nua che giuvnas tochen e cun 18 onns astgan dar campinadi ed aschia han ils Bulls in cader da 14 giuvnas per la proxima sesiun. Nus selegrein gia da veser il svilup da mintgina la proxima sesiun e da puspei ir per puncts. E naturalmein cun il motto: Ina per tuttas, tuttas per ina.

Noemi Zanin, Desertina Bulls